

Puntos alazetals ta l'amostranza de as luengas minoritarias d'Aragón y ta ra suya protezión legal

[Puntos emologatos por a PLATAFORMA TA LA ESFENSA DE AS FABLAS MINORITARIAS D'ARAGÓN o día 12 de mayo de 1996 en Calaceit.]

I. Puntos alazetals de o modelo d'amostranza de as luengas minoritarias d'Aragón que caldrá tener en cuenta.

- A. En as zonas cheograficas do bi ha una luenga diferén de o castellano (ye dizir: aragonés u catalán) a lai deberá guarenziar:
1. O dreito a recullir amostranza entegra en dita luenga en a educación infantil.
 2. L'amostranza de dita luenga en a educación primaria, en educación secundaria y en educación d'adultos.
 3. A posibilidá d'amostranza parzial en dita luenga en os libels de primaria, secundaria y d'adultos.
 4. L'aplicación d'istos tres puntos se ferá de traza progresiba (no de sopetón, sino poquet a poquet).

- B. L'amostranza de as luengas minoritarias (ye dizir: aragonés y catalán) en os suyos respetubes territorios se concretará de a traza siguién:
1. L'oxetibo será que dimpués de rematar l'amostranza obligatoria, os alunnos saban charrar y escribir igual de bien a luenga bernacla (aragonés u catalán) y o castellano.
 2. A luenga bernacla (aragonés u catalán) será una asinatura drento de o curriculum (ye dizir, con caráuter obligatorio), encaxada en l'orario leutibo, con un mínimo de dos oras leutibas por semana.
 3. A luenga bernacla (aragonés u catalán) tendrá una ebaluazión integrada y considerazión en as Prebas d'Azeso ta la Unibersidá.
 4. En educación primaria y secundaria bi abrá, antimás de l'asinatura adedicata a ra luenga bernacla (aragonés u catalán), por o menos una asinatura impartita en a luenga propia (aragonés u catalán).

Luenga & fablas, 1 (1997)

C. Os territorios en do se puede considerar l'aragonés u o catalán como luenga propia serán espezificatos en a lai parando cuenta en bels datos oxetibos sobre l'uso y/u conoximiento de determinaus elementos definitorios (en aspeutos foneticos, morfoloxicos, sintauticos, lesicos y soziolingüisticos). Sin dembargo, de traza esquematica, azeutando presunzions y conoximientos prebios, se puede considerar que o territorio propio de l'aragonés ye l'Alto Aragón y que o territorio propio de o catalán ye a Faxa Oriental.

D. En o resto d'Aragón (territorio istoricamén aragonesofablán y autualmén de fala castellana) se guarenziará:

1. O dreito a recullir, con caráuter otatibo, amostranza de l'aragonés (dos oras semanals encaxatas en l'orario leutibo), en funzión de a demanda y atras zercustanzias baluradas por os Consellos Escolars. Tamién s'incluirá l'amostranza de l'aragonés drento de os Cursos d'Educazión d'Adultos finanziatos por a D.G.A.
2. O dreito a recullir, con caráuter otatibo, amostranza de o catalán (dos oras semanals encaxatas en l'orario leutibo), en funzión de a demanda que bi aiga y atras zercustanzias baluradas por os Consellos escolars, en aquers zentros en os que pueda aber-bi minorías considerables de fabladors de dita luenga (Zaragoza ziudá y localidaz amanadas a ra Faxa oriental: Monzón, Binéfar, Caspe, Alcañiz, ...).

II. Puntos alazetals que abrá de contener a bastida churidica ta ra protezión de as luengas minoritarias d'Aragón.

1. Reconoximiento como luengas propias d'Aragón de l'aragonés y de o catalán.
2. Cooficialidá d'istas luengas en os suyos respetubles territorios (ye dizir, en l'Alto Aragón y en a Faxa Oriental, respetibamén).
3. L'Alministración aragonesa deberá **guarenziar** tanto ta l'aragonés como ta o catalán l'**aplicación entrega de os puntos anteriors y os dreitos que ixos conzeutos implicant**.
4. **Fomento de a cultura propia.** Os territorios en do se conserban l'aragonés y o catalán han una cultura propia que cal rispetar y potenziar.